

SUDAC

Izjavljujen tu pred svima
Sudski proces započima
Sudski proces ta šaljivi
I budite si pažljivi

Se da bude kako štima
Počimlje se pozdravima
Stari, mladi, dica, ženi
Si da ste mi pozdravljeni

Pozdravljan se mudre glavi
Pa prekidan sa pozdravi
Završilaj komedija
I čita se Šentencija

Va njoj piše se čaj bilo
Za leto dan dogodilo
Opisani ljudski grihi
Ma va šali i va smihi

Da se kigod ne uvredi
Šalaj uvik v prvon redi
Autor se dosti brine
Da napišu se istine

Ako kadi skrene mimo
Si mu zato oprostimo
Ne bin otel bit na sudi
Oprostite dobri ljudi

Šalu čovik ku doživi
Mesopust se zato krivi
Komu krivo, komu milo
Oduvik je tako bilo

Ov običaj dobro štima
Dok pametnih ljudi ima
Molin mlade, molin stare
Da se ovo ne utare

Verujte mi ja vas molin
Da ja samo šalu volin
Tu opasku stavljan malu
Dulje živi kij za šalu

Ako čovik šalu voli
Zato glava ne zaboli
Komugd to i nij milo
Bedastih je uvik bilo

Ja in neću pamet budit
Mesopustu moran sudit
Pizardij je bilo dosti
I za njega nij milosti

Obrana mu slabo štima
Abukata mlada ima
Nervozno se malo šeće
Obrana mu uspit neće

Tambur

ABUKAT

Kij ča dobil neka zame
Ne gljedajte grdo vame
Ja sn to na hartu stavil
Ča nij zapil, toj ostavil

Recite mi pravo malo
Pa nikad nij sih zapalo
Ki nij dobil vavon letu
Morebit bu dobil kletu

Ovo se pročitat mora
Sital sej i autora
Na sej mislel, niš ne brini
Dvajset kil muj dal slanini

Ovoj doznal kasno malo
Daj slaninu muj ukralo
Se muj zelo sa sušila
Dabogda mu zadnja bila

Tu na kraji lipo piše
"PIJANDURE" nima više
Pokvaren je bil do srži
Kij ča dobil neka drži

Ovo leto nij dosadil
Pa nij dugo narod jadil
Grdoj svršil, ali neka
Čokovo nas jutro čeka

Još van smo velin ovo
Jutro gremo na Čokovo
Da čujemo nepriliki
Kakove su bile v Riki

TAMBUR

KRAJ

SUDAC

Večernja se bliži ura
Najebal je "PIJANDURA"
Ovo leto malo prijē
Završile komedije

Bribiru se minja slika
Šute bubnji i muzika
Ni parada neče mlada
Brzo hodit oko grada

Kada zato pride hora
Leto dan se čekat mora
Na Male i Vele Vrata
Čut se oče bumbarata

Ovomu se kot i prijē
Veronikin Mata smije
Nit to voli, nit mu smeta
Saki dan gre do Buffeta

Ja ću opet veli Mata
Birtijan opirat vrata
I lipo ću na tanane
Od Buffeta do Kavane

Ja san sebi život štiman
I soldih za život iman
Kuću prodal san i sebe
A rođak se neka jebe

Renati za kuću v gradi
Pun frižider čokoladi
Jednuč lačna prišla z dela
Za jist čokolada bela

Neznan stel i vi za to čuli
Dobraj, ma se jako muli
Svatalaj kad je pojila
Toj od kucka hrana bila

Za Krstića traperice
I dvi "TERMO" čarapice
Jer kad dobro se napije
Čarapa mu nogi grije

Glavu svoju tako čuva
Kad je pijan on se zuva
Tenisice, Bože sveti
Na šanku uz cigareti

Tenisice na šank stavi
Pa se lipo sam zabavi
Obuća mu društvo stvara
S obućun i razgovara

Da zavšin ov list celi
Pozdravil bin lipo Eli
Pa neka mu kot i prijē
Kad ozebe nogi grije

Tambur

ABUKAT

Danas moran bit oprezan
Verujte mi da san trezan
Sakaj baba već to čula
Kada voziš nula, nula

Nič mi stalno v glavi gudi
Mesopust, a trezni ljudi
Zakoni va krajnost gredu
Ovo stvarno nij u redu

Lahko nan se "ONI" groze
Plaćeni su ki njih voze
Nan slobodu ovo guši
Jedna piva, ajde puši

Baš su teške ove stvari
I veselje to nan kvvari
Pa pustimo to po strani
Ja san ovdi zbog obrani

Nič va uho šapće meni
Da si budu pozdravljeni
A ja brigu tu ne vodim
Jel to Drug ili Gospodin

Pozdrav šaljen i Općini
Va današnjoj veličini
Z Bribira do Drivenika
I novoga načelnika

Krivi pravac niki love
Da Općinu raspolove
Za sada reć moren ovo
"Na zapadu ništa novo"

Moru samo Boga krivit
Ča moramo skupa živit
Ljudska usta saća melju
Ovoj borba za fotelju

Kij va pravu, reć će vreme
Mi gremo na druge teme
Ja ne volim teme škure
Totu san zbog "PIJANDURE"

Sucuj v glavi vela zbrka
I smije se ispod brka
Njemu za verovat nije
Čak ni onda kad se smije

Pogledajte kljenta moga
"PIJANDURU" neboškoga
leto dan je samo šutil
Pa on ne bi vodi smutil

"PIJANDURU" jako volim
Pomozite ja vas molim
Promućkajte ljudi glavu
I recite kij va pravu

Tambur

SUDAC

Branitelj se valje jadi
Ko petešić skače mladi
Ča o piću totu smoli
Kada i on popit voli

Bolje se ne pačat vato
Pa san baren miran zato
Jer mudracih dosti ima
Ča god rečeš njin ne štima

Piće bude mu do guše
Još ni moral da in puše
Do sada ga nisu bili
Pijanoga ulovili

To više na niš ne sliči
Niki više nij od riči
Saka vlada obećava
Zač su riči zabadava

Još on miša, mi se čini
Politiku va Općini
Ja ti jeben onu niku
Pusti smiron politiku

Čagod lažuć kij izjavil
Va laži se nij udavil
Da ti rečen malo blaže
Političar saki laže

Branitelju moraš shvatit
Politiku neću batit
Toga baš ne triba meni
Za to drugi su plaćeni

Opet san se uz kritiku
Popačal va politiku
Ali evdi sada piše
Zaklinjen se neću više

Naučil san, mor nis bena
Politikaj kot i žena
Poučak je zato pravi
Il ju jebi il ostavi

Ja san tu zbog "PIJANDURE"
Komu teku zadnje ure
Ulovit ću ga za gušu
Sad zbog njega trezni pušu

Ni va stranki pačat neću
Dal livo il desno skreću
To tij jasno ja se nadan
Da ni jednoj ne pripadan

On je ovu kašu skuhal
Dabogda ti njemu pihal
Dosti mij već toga sega
Bez milosti san za njega

Tambur

ABUKAT

Na kraji se glava luda
Bribirsloga sitil KUD-a
Pohvale in vele daje
Za starinske običaje

On pohvalit isto smira
Vatrogascih iz Bribira
Dvi leta se iskazali
Ti su se od sebe dali

Nastup jedan va "GROMAČI"
Za cel Bribir puno znači
Hvala zato, i čast svaka
Vodil ih je "BATIFJAKA"

Od srca ih on pozdravlja
Sim dečkima puno zdravlja
Da ostane ovo stanje
Da požarih bude manje

Bravo jedan, ma veliki
Za nastupi va "Omoriki"
Odlični su stvarno bili
Krasno Bribir predstavili

Ovo društvo narod voli
Va celomu Vinodoli
Na vrime su sagdi bili
Saki požar ugasili

Nič ostavit evdi smira
Za Bućarski klub Bribira
Ostavlja in on priznanje
Za upornost i bućanje

Kad novini čovik čita
Skoro saki se zapita
Rukomet se igra mali
Zač se dicu ne pofali

Velik uspjeh su postigli
Na nivo se viši digli
Domogli se s puno brige
Županijske prve lige

Moremo bit dični s time
Ča Bribirsko nose ime
Iako su školska dica
To je naša uzdanica

Sad in triba više toga
Tribaju in još dva joga
Velikaj to za njih briga
To zahtjeva nova liga

On in daje su potporu
Hvala Školi i Odboru
Kad se to ozbiljno shvati
Onda će prit rezultati

Tambur

SUDAC

Joži daje Plovaniću
On van stvarno ima sriću
Ostavlja va ovon leti
Od "Viagre" dvi tableti

Ne more dat celu šteku
Mora poč va apoteku
Da tableti kupi ove
Ne zna on kako se zove

On do Bori gre Mureti
Da ga pita za tableti
Neka mu zapiše ime
V apoteku on će s time

Bora njemu objašnjava
Ta tableta stvar je prava
A Joža ga pita, ljudi
Daj mi jednu ti posudi

Bora misli pa se sjeti
I daje mu pol tableti
Pa mu veli malo tiše
Tebij cela i previše

Ni fala mu on ne reče
Nego valje doma teče
Sam se sebi puten smije
Valje će ju da popije

Drugi dan je prišal k Bori
I s praga mu još govori
Slušaj malo bez uvredi
Ta tableta niš ne vredi

Celi mi sej trbuh smišal
Osan put san nočas pišal
Osan put va zahod stigal
Ali mi se miš nij digal

Bora se do suz nasmije
On voli te pizdarije
Dal je Joži s puno volje
Tabletu da piša bolje

Općina je Gradac bila
Lip božićnjak okitila
Evdi piše va dekretu
Da načine to i kletu

To in veli zaistinu
Da pozovu su Općinu
I općinskih službenicah
I Jurasku va kolicah

Ostavlja in na ton placu
Jednu velu lipu tacu
Neka bude puna taca
Od pršuta i prsnaca

Tambur

ABUKAT

Ja san suče dosti miran
Politiku malo diran
Prevarit me sotin nećeš
Ti na druge teme skrećeš

Ja san zibral pravu uru
Da obranin "PIJANDURU"
Ti na jedno oko škiljiš
"PIJANDURU" za se kriviš

Krivicu na njega hitaš
A penzićih niš ne pitaš
Da ti oni reku šćeto
Kij krivac za Novo leto

Ostali su kot va komi
Niš štimalo nij va domi
Ugostitelj pa ni glazba
Toj videla saka baba

Tvoja usta sača melju
Reci to ugostitelju
Večera sej majko mila
Za polnoćun već nosila

Ljuden se već nij ni jilo
I jiloj već hladno bilo
Hladno jilo i pijati
Kij tu krivac suče shvati

Reci dal se komu jebe
Ča va domi narod zebe
Se zlo koda sej spojilo
Nafti nij za grijat bilo

A muzika majko sveta
Brzina se zove peta
Udarali gas do daski
Čuli su se do Juraski

Delali od ljudih beni
I još zato su plaćeni
Reflektori upalili
Ko da su va disku bili

Zabadava da ne lajen
Preporuku lovcen dajen
Da koriste tu galamu
Pa va pogon da jih zamu

Kada bi va pogon stigli
Se bi živo v šumi digli
Probudili bi bez stida
Srnu, prasca i medvida

I na kraju toga sega
Bil i zato krivil njega
Dal ti va Bribiri živiš
Onda pazi koga kriviš

Tambur

SUDAC

Kako ovo narod dura
A krivac je "PIJANDURA"
Krivica i to njegova
Za on slučaj znad Jargova

Milivoj mu znaki šalje
Da gre doma i to valje
Mirko samo gljeda belo
Veli, ovoj moje selo

Zajebala tu krivina
Marina iz Kosavina
Karambol je imel mali
Milivoja valje zvali

Dokazat se Mirku neda
Policija samo gljeda
Čekali su i da vide
Va auto kada side

Za krivicu, neznan čiju
Pozvali i Policiju
Za izreku znate onu
Da se bude po zakonu

Najzad veli gren ja doma
Nij velika bilo loma
Policija za njin kreće
Ovo dobro finit neće

Nezgoda se dogodila
Šteta nij velika bila
Ma da veća bu nesrića
Evo Mirka Vlastelića

Va auto šnjim su seli
I dobru mu meru zeli
Va prijavi Mirku piše
Daj napuhal i previše

Od nikuda pride totu
Sa auton stane sprotu
Da bi drugi ljudi znali
On žmigavci si upali

Katastrofaj na pomolu
Valje zamu mu dozvolu
I kaznenij dobi bodi
Njega kazna ta pogodi

Ne moreš reć daj bil trezan
Paj zato bil neoprezan
Koda mu vrag neda mira
S Policijun diskutira

Platil je i velu kaznu
Razmišljaj je on na laznu
Za njega su kazni teške
Šest miseci hodil pješke

Tambur

ABUKAT

Ovoj stvarno teško stanje
Oporukaj za čitanje
Celon puku bin objavil
Da vidimo čaj ostavil

Ugostitelj ovdi stoji
Dobro soldi da prebroji
Primjedbe su brojne pale
Cijene nisu bile male

Ocu svomu i materi
Se imanje va kuferi
Niš nij nutri mi se čini
Nego dvoje svitičini

Općinuj na popis stavil
Stvarno ih nij zaboravil
Neka sloga totu vlada
Od istoka do zapada

Robij imel jako malo
Toj na njemu čaj ostalo
Nij sirota imal cure
Ka korist od pijandure

Jasnoj to i dicit školskoj
O Općini Vinodolskoj
Da su ju raspolovili
Sirotinje dvi bi bili

Parada i kapetani
Lipi pozdrav kot i lani
Da živi i zdravi bili
Ovo k letu nastavili

Našoj vladi bocu pića
Neka reše do prolića
Ta vjest bi se lipo čula
Da ne vredi nula, nula

Svetojurcu rado daje
Zač voli te običaje
Tako piše va popisi
Ono ča priko dva visi

"PIJANDURA" na rastanki
Pozdravlja se naše stranki
A narodu poručuje
Da ih deset još osnuje

Još paradi mladoj daje
Medalju za običaje
Zač su dosti brojni bili
Običaj su obavili

Vele stranki, a i male
Na državne jasle pale
Ostavlja in jednu kravu
Da ju muzu kot državu

Tambur

SUDAC

Nikad nij previše šali
Neznan stel za ovo znali
Ča se mladost naša siti
Starijih va očaj hiti

Se mi ovo jako smrdi
Niki tu va latu prdi
Niki s nami zbija šalu
Od sih nas dela budalu

Dečkići su bili mladi
Obisili plakat v Gradi
Narodu na znanje dali
Da dobar film igra v sali

Va Domu nij znat se mora
Platna nit projektora
Za prvi red išće mesta
Od Ligatića nevesta

Maslinskaj nedilja bila
Na Vrbi naroda fila
Pitan razlog ovon čudi
Zač je tu tuliko ljudi

Lošej sriće ona bila
Zač nij karte nabavila
Srknulaj čaj va Buffeti
Film gljedala na kazeti

Sul to lovci sa sastanka
Il je tanac, il čajanka
Jedna žena veli sprotu
Ti koda ne živiš totu

Dečkići su tako bili
Puno ljudih prevarili
Pa su se s narodon smeli
Trbuhi ih zaboleti

Sil ti z neba hljopil čera
Ovoj kino premijera
Film da zove se "Pasija"
A Mel Gibson je režija

Narod gre ća kot pokisal
Ispal kodaj vesla sisal
Dečkon triba pružit šapu
Mesopust in skida kapu

Još tu čujen s prve ruki
Isusove to su muki
Još mi veli žena stara
Daj film dobit tri "Oskara"

Ja svoj narod sav poštučen
Pa ga na smrt osuđujen
Sačaj delal on bez stida
I zato se glava skida
(Udarac sabljun)

Tambur

ABUKAT

Ovo se objavit mora
Vjest je stigla iz Podgora
Silni kucki selon gredu
Ovo stvarno nij u redu

Ti nimaju gospodara
Mora zvat vterinara
Da imaju to va plani
Pa da se to potamani

Po Rudinah sakud kreću
Po glavnoj se cisti šeću
Moraš pazit kada voziš
Da in život ne ugroziš

Dva tjedna su prošla bila
Već se kuja nij gonila
Pod repon joj nij već vruće
Nij ni kucak oko kuće

Božo Čor tu kuju ima
Toj pasji rod i to štima
Zatoj vela strka bila
Zač sej kuja ta gonila

Komisijaj prišla bila
I dobro se pripremila
Da po selu kucki love
Kot šintarih kad se zove

Toj priroda kucki znaju
Oko kuće stalno laju
Od laveža glava zvoni
Takoj kad se kuja goni

Trojica su totu bili
Da bi kucki polovili
Po prijavi prišli oni
Ma se kuja već ne goni

Punoy kucak totu bilo
Od sakud sej sakupilo
Od Podskoča mi se čini
Pa se tamo do Kričini

Se gljedaju desno, livo
Jel kadi ko pašče živo
Si su grmi tu obašli
Nijednoga nisu našli

Smrknulo sej Boži lice
Veli to su litalice
Kad kucki na lanci nisu
Neznaš gazdu ni čiji su

Veterinar onda reče
Eno cistun jedno teče
A kad tamo majko mila
Toj Božina kuja bila

Tambur

SUDAC

Se beseda do besedi
Dado Čor je sad na redi
Uvik van je on za šalu
Lanij bil va Portugalu

Stara Simca, a ča drugo
Portugal je jako dugo
To su stvarno dugi puti
Samo su dva va auti

V lipnju van se tamo bila
Sa Evropa sakupila
Portugal je bila meta
Prvenstvo od nogometa

Sa Hrvatskun se ponosi
I bandiru sobom nosi
Ta bandira jako vela
Zadnji sic je zauzela

Evropske se himne soppu
Nogometnu slijede stopu
Da spomenen ovo samo
"VATRENI" su naši tamo

Veća neg i jedna druga
Pedeset je metar duga
Pet široka u tri boje
Ostvaril je želje svoje

"VATRENI" se teško pale
Šanse su nan jako male
Pa se jadni tamo bili
Sasin sega ugasili

Sej od sebe Simca dala
Celi put je izdržala
Dadi ruka na volani
Oliver je s desne strani

Dado velu volju ima
Da pomore "VATRENIMA"
Si za naših navijamo
Dado Čor je krenul tamo

Jel naporno reć ne smiju
Proć Francusku i Španiju
Toj istina nij za šalu
Bili i va Monte Carlu

Jel ozbiljno baš postupil
Jednu staru Simcu kupil
Baš za šalu ima dara
Dvast i pet let je stara

Tu va čudi ljudi stali
I va Simcu su gljedali
Jako su se ljudi smeli
Ma sul je z muzeja zneli

Tambur

ABUKAT

Va Štalah se Maj podiže
Na perilo čeljad stiže
I odojak se okreće
Nij ga koga zapast neće

Z "VRBI" diže se ekipa
Toj akcija sada lipa
Dečki mladi puni moće
Betonaza o pol noće

Da bi Maj va školju vnjeli
Od Peki su traktor zeli
Pripomaže celo selo
Balansira Patalelo

Kad su školju zgotovili
I zakusku si dobili
Energiju da povrate
Kremšnite su u Renate

Tuj i Grga, šef parade
Kontra balans drži Rade
On va svoju ženu bulji
Prije Maja on je v školji

Kad su delo zgotovili
Fanj su već pijani bili
"VRBA" nova in je ruta
Bolje in se makni s puta

Pomoć stiže i z Kičera
Ali spravlja se "NEVERA"
Ki tu koga sad navlači
Fajteri i navijači

Maskirani kot z rata
Ulaze na glavna vrata
Pivajući evo dana
Evo Jure i Bobana

Kot loptice su od "BINGA"
Si Carići nasrid ringa
Situacija sej bila
Dosti brzo rasčistila

Ljubo š njimi, fanj se ljujla
Kaciga mu glavu žulja
Davor Carić mira nima
Vlastitoga miša snima

Ali problem Štale voli
Za par dan je jelvić doli
Bor je bura zičupala
V noći panika nastala

Renati na uše para
Sil vlasnica striptiz bara
Oblači se brzo totu
Ne nateži tu sramotu

Tambur

SUDAC

Va Općini više-manje
Redovito uvik stanje
Željka, s njun i Vesna Bela
Jedan dan su prošle z dela

Odgovor on spremno šalje
Tu čekajte stižen valje
Dok njen Marinko ne pride
Va kafíci novon side

Počeci su priče ove
Posal jedan v Riku zove
V Rikij prošlo ko po loju
Do nazad će popit koju

Čašica se nova diže
Sad su mirne šofer stiže
Ali ura već prolazi
A Marin ne nailazi

Na "Vidikovac" kada stižu
Totu prvu čašu dižu
Onda druga, treća, peta
Okolo njih kelner šeta

U Marinaj slaba srića
Željka zove Stojevića
Stiže pjesnik, a i "Miko"
Tek sad piju naveliko

V lokali i pandur stoji
Pomalo in ture broji
Petnajsta se tura pije
A pandur se samo smije

Totu priča nij gotova
Nevolja se sluti nova
Piju oni, šumi more
Stiže Mile z dijaspore

Sada triba vozit doma
A obi dvi već su koma
Svjest panduru neda mira
Va Bakarci ih stopira

Skroz muj dogorela korda
Kad je spazil svoga Forda
Zavo dalje niman sluha
Jezikovaj pala juha

Pozovite koga valje
Ne moren vas pustit dalje
Prvi poziv valje krene
Do Marina do Kostrene

Ki zna da nij bilo Mili
Bil još uvik tamo pili
Još bi mnoga pala tura
Krivac bi bil "PIJANDURA"

Tambur

ABUKAT

Drugaj tura bila v plani
I va Grčku krenul lani
Rukomet zanima Dadu
Krenul je na Olimpijadu

Nij to bila vela greška
Čaj zastava jako teška
Neg je Dadu totu bila
Policija uhitila

Krenul je na vožnju drugu
Grčkaj od nas prema jugu
Istoj dosti proč terena
Ma sada šnjin gre i žena

Velik paket sobun nosi
Sa zakonom to se kosi
Policija misli ista
Kakoj Dado terorista

Razdaljinuj prošal manju
Rukomet je u pitanju
More saki da se siti
Tu su naši favoriti

Nij na pravi ulaz ušal
Već na krivi on pokušal
Kroz dvorište jedno kreće
Va dvoranu dospit neće

Va Atenij gužvi bilo
Sila svita sej skupilo
Vela gužva vrući dani
A igra se va dvorani

Prova Dado i na šalu
Zač su naši va finalu
Utakmicu žena gljeda
Policija Dadi neda

Mukuj imel stvarno pravu
Opet nosi on zastavu
I imel je on va planu
Sa zastavun va dvoranu

Policija Grčka ova
Smatra Dadu za lopova
I sumnjali, Bože sveti
Daj elsploziv va paketi

Ulaznice nabavili
Ali se i rastavili
Va dvoranu žena kreće
Ali Dado lahko neće

Toj istina šalu v stranu
Nij bil dospel va dvoranu
Tek muj žena rekla bila
Daj Hrvatska pobjedila

Tambur

SUDAC

Evoj strana jedna puna
 Za Nikolu nan Pešuna
 Si ga znate i to štima
 Va Podskočih kozi ima

Na vrh sela gori skrozi
 Štalica muj tu za kozi
 Da ih ima celo jato
 Prošlu jesen čul san zato

Vridan čovik to se slaže
 I punica mu pomaže
 Velik posal zel je nase
 V leti blago sakud pase

Brste grmi kozji zubi
 Kadagod se blago zgubi
 Prošlo leto mu sej bilo
 Celo stado izgubilo

Nigdir blaga blizu kuće
 Sunce prži jakoj vruće
 Punica muj prestrašena
 Gredu iskat on i žena

Preišćite redon gaji
 Vi morete, vi ste mlaji
 Punica in moral diže
 Ona išće kadij bliže

Ideja je bila nišća
 Da gredu na Pokojišća
 Z vrha dobar pogled ima
 Dalekozor se uzima

Hodeć jako se umore
 Sunce peče, stene gore
 I tako po vrući dani
 Prišli oni do vrh strani

Gljedaj zdolu, gljedaj zgoru
 Pa ni gljedt već ne moru
 Celi vidik tu pretraže
 Dalekozor ne pomaže

Sunce tuče ih va oči
 Gredu nazad va Podskoči
 Oprezno se zdolu gazi
 A suncej na zalazi

Umorni su jako bili
 Rado vodi bi popili
 Se gljedajuć gredu zdolu
 A već je noć na pomolu

Po vrućini blagoj bilo
 Nigdi va hlad se sakrilo
 Prije njih je sada znamo
 Blago prišlo doma samo

Tambur

ABUKAT

Va rezervi jedna strana
 Uvik bude za Zlatana
 Da opišen šalu piću
 O Zlatanu Ligatiću

Leto dan je va penziji
 Ma nikako nervozniji
 Lani mi se on potuži
 Da ga zdravlje baš ne služi

Puno toga on nabroji
 Ali miš još uvik stoji
 Veli totu niš ne fali
 I Eva se niš ne žali

Lanij imel vele muki
 Križa bole ga i kuki
 Doktorica ga naganja
 Neka se va mori banja

Ne voli baš poč na more
 Kad se kreće još muj gore
 Još bi se po stenah slupal
 Zlatan doma bi se kupal

Toj lahko reć, moj nebore
 Ki mu oće prnest more
 Suseda sej Nada bila
 Dobrovoljno prijavila

Nada Pipinića Osi
 Va bocunih more nosi
 Ljudski ona tu postupa
 Pa neka se Zlatan kupa

Morda Zlatan ča omoća
 Cel dan se va mori toća
 Za Zlatana toj idila
 A guvno muj plaža bila

Da ga bolje sunče tuče
 Lipo se do gola suče
 Istinaj to ljudi živa
 Tako gol po kadi pliva

Frizerka gaj Mira bila
 Totu gola opazila
 Ona isto vidit voli
 Kadi kupaju se goli

Ta prizor joj jako paše
 A Zlatan po kadi jaše
 Dosti dugo ona špija
 Baš je Zlatan komedija

Saki dan je kašnje stala
 I za čoškon bi špijala
 Jel Zlatan na plažu stigal
 I jel mu se bože digal

Tambur

SUDAC

Za Matelu dva, tri stiha
Ovoj isto vridno smiha
Ivej uvik bil za šalu
Desilo sej to na Kalu

Ive ima želju vruću
Da uredi gorsku kuću
Da ostvari mu se želja
Zel majstora prijatelja

Prošli oni zgoru rano
Prije dana polagano
Da bi bilo veselije
Popili i dvi rakije

Dosti mirni niš ne buče
Prema Brezah konj ih vuče
Pa pomalo gredu zgoru
Kraj birtije proć ne moru

Kad sej pila tura peta
Uraj bila već deveta
Kad sej piće to popilo
Veli Ive dostij bilo

Na kola su totu seli
Tri su boce sobun zeli
Ive reče tad Matelo
Moramo ća, čeka delo

Oko deset su na Kali
Na delo se valje dali
Prognozi su dosti sive
Obed oće kuhat Ive

Valje Ive oganj sniti
I va lonac meso hiti
Nete samo kosti glodat
Kašnje oće paštu dodat

Nij tu dela puno bilo
Ali sej previše pilo
Dela se tu kot zalazna
Trećaj boca skoro prazna

Kulikoj ur reć van neću
Obadva se jedva kreću
Nikako sej Ive sitil
Još nij paštu kuhat hitil

Valje Ive škartoc traži
Više ih je na stalaži
Jedan zame i prnese
Sadržaj va juhu strese

Smutili ga vinski đavli
Paj va juhu stresal čavli
Stari ljudi ovo znaju
S čin se konji potkivaju

ABUKAT

Šentencija manje, više
Se ća dozna to opiše
Velika bi greška bila
Kad bi lovcih pozabila

Ovoj društvo dosti brojno
A djeluje dragovoljno
Posebna su malo sorta
Lov je isto vrsta sporta

Slučaji su sakakovi
Kada bude se va lovi
I događaj smišan tada
Va lovačke priče spada

Nij baš uvik med i mlijeko
To more reć Igor "Kleko"
Hodeć s puškun on po gori
Mora malo da odmori

Va umornon tako stanju
Sidel je na jednon panju
Umoril sej, čaje tuje
Pa postola oba zuje

Sideć srce ga zapeče
Jelen tuda baš proteče
Vidi Igor, on je znalac
Daj to pravi kapitalac

Va momenti niš nij čekal
Za jelenon bos je tekal
Na kraj te lovačke priče
Ta jelen i dalje riče

Ni ovo preskočit neću
Naši lovci na Rab kreću
Nij odlazak izletnički
Na lov kreću zajednički

Spomenut se ovdi mora
Jadranka i Mirka Čora
Ali slaba prati srića
Jednoga od dva bratića

V Novi pridu, toj u redu
Ma s auton jednin gredu
Pa Jadranko svoga bira
Mirko neka tu parkira

Va auto jedan sidu
Do Jablanca brzo pridu
Na trajekt se ukrkali
A onda se Mirko žali

Za lov iman volju mušku
Ma triba imit i pušku
Mirko veli nij to šala
Daj va Novon mu ostala

SUDAC

Ovoj isto bilo lani
A Božićni su blagdani
To stvarno na lipo slič
Božićnjakih ko u priči

Božićnjaki mali, veli
Biloj skoro v sakon seli
Da rečemo kakoj bilo
Kad na Gracu sej kitilo

Skupilo sej društvo velo
A veseloj Gradac selo
I vridni su stvarno bili
Brzo su ga okitili

Biloj totu stvarno sača
Vina, soka i kolača
Iz sake se kuće nosi
Selo sotin se ponosi

Sviralo sej da se praši
Tome Dražić s tamburaši
Bečarske se pisme ore
Ovo samo Gradac more

V društvo more saki priči
Si su totu Ligatići
Josip svira, Ive piva
Komedijaj Tiho živa

Ni Juraska tu ne fali
V kolicih ju pripeljali
Veli da bar dok je živa
Sa narodon se napiva

Uživalaj friškin zrakon
V kolicih pod božićnjakon
Pripeljanaj, moj nebore
Dva koraka proč ne more

Kad je malo zaškurilo
Vani in je zima bilo
Društvo novo mesto traži
Poli Tihi va garaži

Gori bolje su prognoze
I Jurasku gori voze
Društvoj bilo ko u priči
Morebit ju to izliči

Lipo društvo daj milina
Bolje nego medicina
A pivala , a ne pila
Pivajuć je ozdravila

Od toga su puno gori
Međugorje i doktori
S kolic se pomalo stala
I doma se odšetala

Tambur

ABUKAT

Daj ne gnjavi ja te molin
Ja ov narod jako volin
Dok čovik po zemlji hodi
Sača mu se i dogodi

Va životi više puta
Žuta pride ti minuta
Ma kuliko čovik pazil
Koda na nič si nagazil

Da me krivo on ne svati
O Mazoru rič je Mati
Verovat muj teško bilo
Kako mu sej to desilo

Gre s auton on i žena
Prikolicaj zakučena
Na put gredu jedan pići
Gre po drva va "Gorići"

Deblja drva otpeljane
Ostale su samo grane
Količine dosti male
V prikolicu se su stale

Vozi ovaj teret isti
Lipo zgoru prema cisti
Uspon je tu malo jači
Za mercedes niš ne znači

Baš po malo doma gredu
Misli Mate sej u redu
Celin puten se šalili
On i Nada sami bili

Matij mislin toga puta
Žuta prišla baš minuta
Lahkoj ovaj posal svačal
Maloj pažnje on obračal

Pred kućun su doma stali
Z auta van poskakali
Nadi se ukoči lice
"Mate mor nij prikolicе !"

Mate niš ne odgovara
Dal ga ovo oko vara
Varaju ga oba uha
Nij mu pola auspuha

Ča moremo Mate veli
Va mercedes nazad seli
Krenuli su nazad tako
A auspuh grmi jako

Prikolicaj ispod puta
I na bok je prevrnuta
Blizu "Gorić" tu sej bila
Od auta odkučila

Tambur